



Broj: 10/E-11-2731/25
Sarajevo, 30-05-2025 godine

Na osnovu člana 69. stav (2) tačka d) i člana 70. stav (1), (4) i (6) Zakona o javnim nabavkama BiH („Službeni glasnik BiH”, broj 39/14, 59/22 i 50/24) (u daljem tekstu: Zakon), člana 69. Statuta Općine Centar Sarajevo – Prečišćeni tekst („Službene novine Kantona Sarajevo”, broj 23/04), na prijedlog Komisije za nabavku roba, usluga i radova II, imenovana rješenjem Općinskog načelnika broj: 10-45-163/25 od 05.03.2025. godine (u daljem tekstu: Komisija II), u postupku javne nabavke terenskog vozila za potrebe Općinskog štaba civilne zaštite, putem otvorenog postupka (Zapisnik broj: 10/E-11-2731/25 od 21.05.2025. godine), Općinski načelnik donosi:

O D L U K U **o poništenju postupka javne nabavke**

I

Poništava se postupak javne nabavke terenskog vozila za potrebe Općinskog štaba civilne zaštite, putem otvorenog postupka, iz razloga što primljena ponuda nije prihvatljiva.

II

Ova Odluka se dostavlja svim ponuđaču koji je u u postupku javne nabavke u roku od sedam dana, shodno članu 70. stav (2) i članu 71. Zakona o javnim nabavkama.

III

Odluka će se objaviti na web stranici Općine Centar Sarajevo (www.centar.ba) u skladu sa članom 70. stav (6) Zakona o javnim nabavkama.

O b r a z l o ž e n j e

Postupak javne nabavke terenskog vozila za potrebe Općinskog štaba civilne zaštite, pokrenut je Odlukom o pokretanju postupka javne nabavke, putem otvorenog postupka, broj: 10/E-11-2731/25 od 11.04.2025. godine.

Postupak javne nabavke nije podijeljen na lotove.

Procijenjena vrijednost nabavke bez uračunatog PDV-a iznosi 81.190,00 KM.

Obavještenje o nabavci broj: 848-1-1-47-3-106/25 objavljeno je dana 24.4.2025. godine na Portal javnih nabavki (www.ejn.gov.ba).

Tenderskom dokumentacijom i Obavještenjem o nabavci određen je rok za prijem ponuda 20.05.2023. godine do 11:00 sati.

U krajnjem roku za predaju ponuda koji određen tenderskom dokumentacijom (20.05.2025. godine do 11:00 sati), na adresu Ugovornog organa primljena je 1 (jedna) ponuda dostavljena od ponuđača „AC QUATTRO” d.o.o. Sarajevo, što je evidentirano u Zapisniku o otvaranju ponuda, broj: 10/E-11-2731/25 od 20.05.2025. godine. Nije bilo neblagovremeno pristiglih ponuda.

U skladu sa članom 63. Zakona o javnim nabavkama (u daljem tekstu: Zakon), Komisija II je u zakazano vrijeme pristupila javnom otvaranju pristigle ponude i nakon što je utvrđena blagovremenost i urednost dostave, pročitana je cijena ponude, kako slijedi:

r/b	Ponuđač	Ukupna cijena ponude bez PDV-a sa registracijom (KM)	Popust	Ukupna cijena ponude sa PDV-om (KM)
1.	„AC QUATTRO” d.o.o. Sarajevo	81.270,95	/	94.900,00*

*Ukupna cijena obuhvata cijenu vozila u KM sa uračunatim PDV-om i registracijom

Nakon izvršenog javnog otvaranja ponuda, na zatvorenom sastanku, Komisija II je ponudu ponuđača „AC QUATTRO“ d.o.o. Sarajevo ocijenila neprihvatljivom, u smislu člana 2. stav (1) tačka I) alineja 2) Zakona o javnim nabavkama („Službeni glasnik BiH“, broj 29/14, 59/22 i 50/24).

Naime, uvidom u Obrazac za cijenu ponude (Aneks 2.), dostavljen na strani 07 primljene ponude, Komisija II je konstatovala da je ponuđač „AC QUATTRO“ d.o.o. Sarajevo ponudio cijenu za predmetnu robu/vozilo bez registracije u iznosu od **80.170,95 KM bez PDV-a**, koja zajedno sa cijenom registracije vozila, u iznosu od **1.100,00 KM**, čini ukupnu vrijednost od **81.270,95 KM bez PDV-a**, što premašuje ukupnu procijenjenu vrijednost predmetne nabavke. U skladu sa utvrđenim Komisija II je zaključila da je ponuda neprihvatljiva.

Slijedom navedenog Komisija II je zaključila da je ponuda ponuđača „AC QUATTRO“ d.o.o. Sarajevo iznad procijenjene vrijednosti, odnosno cijena ponude prelazi osigurana novčana sredstva Ugovornog organa za predmetnu nabavku.

Poglavljem 3. OPŠTI PODACI O POSTUPKU JAVNE NABAVKE, tačkom 3.3. tenderske dokumentacije, između ostalog, navedena je ukupna procijenjena vrijednost nabavke u iznosu **81.190,00 KM bez PDV-a**, koju je Ugovorni organ odredio u smislu člana 15. stav (1) tačka a) Zakona o javnim nabavkama.

U Obrascu za cijenu ponude (Aneks 2.) naznačena je rubrika za upis podatka o iznosu cijene registracije vozila koje se nabavlja. Cijena vozila bez PDV-a zajedno sa cijenom registracije formira ukupnu cijenu vozila bez PDV-a koju nudi ponuđač, a koja treba da bude u okviru procijenjene vrijednosti nabavke.

Članom 2. stav (1) tačka I) alineja 2) Zakona o javnim nabavkama propisano je da je neprihvatljiva ponuda čija cijena premašuje planirana odnosno osigurana novčana sredstva ugovornog organa za nabavku ili ponuda ponuđača koji ne ispunjava kriterijume za kvalifikaciju privrednog subjekta.

Dakle, neprihvatljiva ponuda je ponuda koju je ponudio ponuđač, koja ne ispunjava zahtjeve u pogledu kvalificiranosti, odnosno ne ispunjava kvalifikacijske uslove definisane tenderskom dokumentacijom.

Također, neprihvatljivom ponudom smatra se i ponuda čija cijena prelazi planirana, odnosno osigurana novčana sredstva ugovornog organa za nabavku.

U otvorenom postupku javne nabavke i konkurentskom zahtjevu za dostavu ponuda gdje je predviđeno provođenje e-aukcije neprihvatljivost ponude se cijeni prije zakazivanja e-aukcije.

U skladu sa članom 15. Zakona o javnim nabavkama Ugovorni organ je zasnivao računanje procijenjene vrijednosti ugovora o javnoj nabavci robe – terenskog vozila na ukupnom iznosu, uključujući i troškove registracije, koji će platiti, bez poreza na dodatu vrijednost (PDV).

Zakonodavac u članu 15 stav (2) tačka c) Zakona o javnim nabavkama propisuje:

„U određivanju procijenjene vrijednosti javne nabavke robe, usluga ili radova ugovorni organ dužan je uključiti sve elemente cijene koju plaća za nabavku te robe, usluge ili radova“.

Shodno navedenom u konkretnom slučaju Ugovorni organ je prilikom utvrđivanja ukupne procijenjene vrijednosti nabavke, uzeo u obzir ukupnu cijenu vozila i usluge registracije bez PDV-a, te je na osnovu toga i odredio procijenjenu vrijednost od 81.190,00 KM bez PDV-a, koja je i navedena u tački 3.2. tenderske dokumentacije.

Član 17. stav (2) tačka h) Zakona o javnim nabavkama propisuje da je procijenjena vrijednost nabavke mandatoran podatak svake pojedine nabavke obuhvaćene planom nabavki. Član 53. istog Zakona reguliše neophodne informacije tenderske dokumentacije, a u stavu (3) tačka s) navedenog člana zakonodavac propisuje da tenderska dokumentacija sadrži i podatak o procijenjenoj vrijednosti javne nabavke.

Objavom tenderske dokumentacije na Portal javnih nabavki (www.ejn.gov.ba) omogućeno je svim potencijalnim ponuđačima da, pored ostalih bitnih podataka vezanih za konkretnu nabavku, saznaju podatak o procijenjenoj vrijednosti nabavke, te da u skladu sa istom, a uzevši u obzir sve ono što Ugovorni organ zahtijeva da bude uračunato u cijenu ponude, formiraju cijenu svoje ponude koja ne premašuje navedeni iznos procijenjene vrijednosti bez poreza da dodatu vrijednost određene nabavke. Prema utvrđenim činjenicama, a pozivajući se na naprijed navedene odredbe Zakona o javnim nabavkama, Komisija II je ponudu ponuđača „AC QUATTRO“ d.o.o. Sarajevo isključila iz daljeg postupka i evaluacije.

Odredbom člana 69. stav (2) tačka d) Zakona o javnim nabavkama propisano je da je ugovorni organ obavezan poništiti postupak javne nabavke u slučaju da nijedna od primljenih ponuda nije prihvatljiva. U skladu sa navedenim, Komisija II je na sjednici održanoj dana 21.05.2025. godine, putem javnog glasanja, jednoglasno donijela odluku kojom Općinskom načelniku, rukovodiocu Ugovornog organa, predlaže da na osnovu člana 69. stav (2) tačka d) Zakona o javnim nabavkama („Službeni glasnik BiH“, broj 39/14, 59/22 i 50/24) donese odluku o poništenju postupka javne nabavke terenskog vozila za potrebe Općinskog štaba civilne zaštite, o čemu je sačinila Zapisnik o pregledu i ocjeni ponuda broj: 10/E-11-2731/25 od 21.05.2025. godine.

Općinski načelnik u postupku predmetne nabavke nije našao razloge niti nepravilnosti u radu Komisije II koji bi bili osnov za neprihvatanje prijedloga Komisije II, te je u skladu sa članom 70. stav (1) i (4) Zakona o javnim nabavkama donio odluku kao u dispozitivu.

Pouka o pravnom lijeku:

Protiv ove Odluke može se izjaviti žalba Uredu za razmatranje žalbi putem Ugovornog organa, najkasnije u roku od 10 (deset) dana od dana prijema ove Odluke, shodno članu 101. stav (1) tačka d) Zakona o javnim nabavkama („Službeni glasnik BiH“, broj 39/14, 59/22 i 50/24).

Naknada za pokretanje žalbenog postupka iznosi 3.000,00 KM u skladu sa članom 108. stav (1) tačka c) Zakona o javnim nabavkama.

Žalba se podnosi u dovoljnom broju primjeraka, a koji ne može biti manji od tri.

Uz žalbu se dostavlja dokaz o uplati naknade za pokretanje žalbenog postupka i kopija bankovnog izvoda računa sa kojeg je izvršeno plaćanje u iznosu propisanom članom 108. Zakona o javnim nabavkama, na osnovu kojeg se može nesumnjivo utvrditi da je transakcija izvršena.

Prilog: Zapisnik o pregledu i ocjeni ponuda

broj: 10/E-11-2731/25 od 21.05.2025. godine

**Dostaviti:**

1. Ponuđaču: "AC QUATTRO" d.o.o. Sarajevo
ulica Put života broj 1, 71000 Sarajevo
2. Službi za civilnu zaštitu
3. Kabinetu općinskog načelnika – Odsjek za javne nabavke
4. U spis